

գեր. Մարգիս արքեպիսկոպոս Ջալալեան *) և Մակար եպիսկ. Բարխուդարեանց **) անձամբ շրջել են Ուտիացոց աշխարհում, բայց սրանք շատացել են գրել միայն տեղագրական չոր ու ցամաք տեղեկութիւններ: Իսկ Ուտիացոց ժողովուրդների վարք ու բարքի, ընտանեկան նիստ ու կացի, ազգային հնաւանդ սովորութիւնների ու առանձնայատկութիւնների, նրանց հոգեկան ու բարոյական արժանիքների և թերութիւնների մասին չէք գտնի և ոչ մի խօսք: Հարկաւ, այս ամենի մասին ժողովրդի ներքին խաւերում չէր կարող թափանցել ոչ մի ճանապարհորդ, որի բուն նպատակն է շրջել գիւղէ գիւղ, քաղաքէ քաղաք և իւր տեսածներն ու լսածները ճշտութեամբ գրի առնել: Մի անձանօթ և մոռացուած ժողովրդի հոգեկան և բարոյական պատկերը իւր հարազատութեամբ միայն նա կարող է ստոյգ արձանագրել, ով որ այդ երկրումն է ծնուել ու սնուել և կամ այդ երկրումն է ապրել ու շնչել երկան տարիներից ի վեր: Ի դէպ է ասել, որ, բարեբախտաբար, գեր. Տ. Արիստակէս արքեպիսկ. Սեղրակեան սրբազանը այդ կողմից, իւր կարգակից սրբազան եղբարց մէջ, մի առանձին բացառութիւն է կազմում: Վասն զի՝ 1867 թ. Ղարաբաղի թեմ. Առաջնորդ Ջալալեան Սրբազան իւր փոխանորդ 22-ամեայ երիտասարդ բարձր. Տ. Արիստակէս վար-

*) «Ճանապարհորդութիւն ի Մեծն Հայաստան», հատոր բ. տես, 379—380 երես:

**) «Աղուանից երկիր և դրացիք», տես, երես 244—245: